

DOMENIE VIII «VIE PAL AN»

Jutoris pe Liturgjie

Ai 26 di Fevrâr dal 2017

In cheste domenie al continue e si conclût pe liturgjie de Messe il grant discors des beatitudinis. Di fat domenie che e ven o sarin ai 5 di Març, Prime domenie di Coresime.

Matieu, e di consequence la leture di Isaie, nus presentin un Diu che nol bandonarà mai i siei fis. Lui al è plui che une mari-pari providents.

Chês di vuê a son pagjinis di une bielece e di un afiet plui unics che rârs; però, tal scoltâlis o scugnìn simpri vê presint Cui-Chel che lis à proclamadis: Gjesù di Nazaret. Ancje vuê, come simpri, prime di disvuluçâ il regâl, o vin di cjalâ a la persone, a la vite e al spirt di Gjesù che nus fâs chest regâl.

Se si smentein di cheste curnîs, al è facil che o colin tal fideisim, te leteradure, te poesie, te emozion, tal romanticisim. E par ultim: tal ingjan e te delusion.

La vite di Gjesù cu lis sôs vicendis de nassite a Betlem fin a la muart sul Calvari e reste la miôr garanzie pal coment a ce che vuê la liturgjie nus propon.

Antifone di jentrade

cf. Sal 17,19-20

Mi à tignût sù il Signôr,
mi à liberât e puartât te largjure,
parcè che mi vûl ben, mi à salvât.

Colete

Diu onipotent, danus par plasê la gracie
che il cors dal mont al ledi indenant seont il to progjet di pâs,
e la tô Glesie e puedi servîti contente e cence pôris.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 49,14-15

Jo no ti dismentearai par mai.

Ancje se o sierin i scûrs di cjase, il soreli al continuerà a mandânus la sô lûs; par tant che un fi al coli in disgracie, la mari-il pari no lu bandonaran par mai; anzit i saran ancjemò plui dongje.

Cussì al è di chê Compassion eterne che si clame Diu.

Salacor il fi nol comprend l'afiet fat di sudôr e di sanc dai gjenitôrs; ancje nô o sin ben lontans dal sintî l'amôr di Diu che in Crist al è diventât sanc spandût par noaltris (cfr. Lc 22, 20).

Rumiin dentri di nô ce che il Signôr nus dîs: jo no ti dismentearai par mai.

Dal libri dal profete Isaie

Sion e diseve: «Il Signôr mi à bandonade,
e il Signôr mi à dismenteade».
Puedie la femine dismenteâsi dal so frut,
finî di vê dûl dal fi des sôs vissaris?
Ancje se lôr si dismenteassin,
jo no ti dismentearai par mai.
Peraule di Diu.

SALM RESPONSORIÂL

dal Salm 61

Il salm intîr si lu cjate tal Salteri al n. 62 e al invade a fidâsi dome tal Signôr butant di bande lis falsis sigurecis che a vegnin de prepotence e de robe dal mont (cfr. 62, 11).

Culî dut chest al è superât, nol ven nancje nomenât; l'anime dal piu israelit e je dute cjapade di une grande fiducie e pàs parcè che di Diu e ven la mê salvece. E duncje o podin ancje dî:

R. Di te, Signôr, mi fidi e li di te mi pari.

Se cjantât: Il ciant dai salms responsoriâi, p. 58.

Dome in Diu si cuiete la mê anime,
parcè che di lui e ven la mê salvece.
Dome lui al è la mê crete e la mê salvece,
il fuartin che mi pari: no cloparai par mai. **R.**

Dome in Diu si cuiete la mê anime,
parcè che di lui e ven la mê sperance.
In Diu e je la mê salvece e la mê glorie;
il fuartin che mi pare e il gno ripâr a son in Diu. **R.**

Fidaitsi simpri di lui, vualtris ch'ò sês il so popul;
denant di lui sbrocait il vuestri cûr.
La potence e je di Diu
e al è to, Signôr, il boncûr. **R.**

SECONDE LETURE

1 Cor 4,1-5

Il Signôr al palesarà lis intenzions dai cûrs.

I tims che o stin vivint a son fats di imagjine esteriôr, di confronts continuis, di personajos, di fâsi valê e di sintîsi cualchidun te opinion publice. Di fat la nestre societât e à la smanie dal comparî: in place, sui gjornâi, par television, in internet. Intant, cui pensial al judizi di Diu sore lis propriis azions? In chescj aiars, il judizi di Diu e de sô peraule a son svaporâts, scomparîts.

L'Apuestul al dîs: no mi impuarte nuie di jessi judicât di vualtris o di un tribunâl uman; chel che mi judiche al è il Signôr! E al zonte: Lui al metarà in lûs i segrets ch'a son tal scûr e al palesarà lis intenzions dal cûr. Chest toc di s. Pauli nus ten lontans dai judizis e des opinions de place e nus indrece su la stade juste: chê dal judizi dal Signôr.

De prime letare di san Pauli apuestul ai Corints

Fradis, ognidun al à di cjâlânus come servidôrs di Crist e ministradôrs dai misteris di Diu.

Poben dut ce che si pratint dai ministradôrs al è che ognidun al sedi cjatât fedêl.

Par chel che mi rivuarde me, no mi impuarte nuie di jessi judicât di vualtris o di un tribunâl uman; che anzit, no mi judichi nancje par cont gno, parcè che se ancje no sai di vê fat alc di mâl, no par chel o soi justificât. Chel che mi judiche al è il Signôr! Par chel no stait a fâ nissun judizi prime dal timp, fin che nol torne il Signôr. Lui al metarà in lûs i segrets ch'a son tal scûr e al palesarà lis intenzions dal cûr; e in chê volte ognidun al varà di Diu la laude che si merte.

Peraule di Diu.

CJANT AL VANZELI

Zn 15,15

R. Aleluia, aleluia.

Us ai clamâts amîs, al dîs il Signôr,
parcè che dut ce che o ai sintût di gno Pari
us al ai fat cognossi.

R. Aleluia.

VANZELI

Mt 6,24-34

No stait a tormentâsi pal doman.

Come che o disevi te introduzion: la vite di Gjesù cu lis sôs vicendis de nassite a Betlem fin a la muart sul Calvari e reste la miôr garanzia par chê fiducie in Diu che chest vanzeli nus propon.

In plui, o vin di meti come clâf di leture il tocut: Cirîf prin di dut il ream di Diu e la sô justizie, e dutis chestis robis us saran dadis in soreplui.

O zotî la memorie di cualchi persone che, tes sôs miseriis e strussiis, chest vanzeli lu à vivût tal concret. Fat chest, invochin te preiere il Spirtu Sant e lui nus iluminarà.

Dal vanzeli seont Matieu

In chê volte Gjesù al disè ai siei dissepui: «Nissun nol pues servî doi parons; parcè che o al odearà un e i volarà ben a di chel altri, o si tacarà a un e al trascurarà chel altri. No podês servî Diu e mamone.

Par chel us dîs: pe vuestre vite no stait a lambicâsi di ce che o mangjarês e o bevarês; e nancje pal vuestri cuarp, di ce che o vês di metisi intor. La vite no valie forsît plui de bocjade e il cuarp plui de munture? Po cjalait i ucei dal cîl: no semenin, no seselin, no ingrumin sui cjascj. Cun dut a chel, il Pari vuestri celest ju manten; e vualtris no valêso plui di lôr? Cui di vualtris, par tant ch'al scombati, esal bon di zontâ un sôl comedon a la sô stature? E par cont dal vistîf, parcè si tormentaiso? Cjalait i zîs de campagne, cemût ch'a vegnin sù: no lavorin e no tiessin. Cun dut a chel, us dîs che nancje Salomon, in dut il so sflandôr, nol jere vistût come un di lôr. Se Diu al vistis cussì la jerbe de campagne, che vuê e je e doman le butin tal fûc, trop no us vistissaraial vualtris, int di pocje fede? No stait a tormentâsi duncje disint: Ce bevarino? o: Ce vistîf si metarino intor? Dutis chestis robis lis cirin i paians. Ma il Pari vuestri celest al sa che us coventin dutis chestis robis. Cirîf prin di dut il ream di Diu e la sô justizie, e dutis chestis robis us saran dadis in soreplui. No stait a tormentâsi duncje pal doman, parcè che il doman al varà za i siei fastidis. Ogni di and à avonde de sô fadie». Peraule dal Signôr.

Su lis ufiertis

Diu, che tu nus dâs ce che nô o ufrin al to non
e tu metis l'ufierte in cont dal nestri servizi e suditance,
o suplichin il to boncûr
ch'al deventi par nô un premi
ce che par tô bontât al ven segnât a nestri merit.
Par Crist nestri Signôr.

Antifone a la comunion

cf. Sal 12,6

I cjantarai al Signôr che mi à judât,
o vuei laudâ il non dal Signôr, l'Altissim.

O ben:

Mt 28,20

Ve che jo o soi cun vualtris ducj i dîs,
fint a la fin dal mont, al dîs il Signôr.

Daspò de comunion

Daspò di vênus sostentâts cul to regâl ch'al salve,
o prein, Signôr, il to boncûr:
par che, cun chest sacrament che tu nus nudrissis tal timp,
tu nus fasis vê part de vite eterne.
Par Crist nestri Signôr.

* * *

Riflession di pre Antoni Beline: **Pensâ ma no bassilâ**

Grande regule morâl oltri che acetazion umil e fedêl di une persone divine e umane, Crist, il vanzeli ogni tant si palese ancje par un grant libri di sapience e di sintiment e nus dà cualchi ressipte di ben vivi ancje tal sens di fâ une vite come che Diu comande, ma biele e no un cjastic. Par chel mi bat e mi batarai simpri...

Vanzeli par un popul, an A, p. 143

* * *

Cjants

- Cjants des domeniis Vie pal an.
- Cui mi dîs ce tantis stelis, *n. 1*;
- Quanta sete nel mio cuore, *n. 136*;

Salm 22: Il Signôr al è il gno pastôr, *n. 241*.

* * *

La storia la insegna Dio e non noi e l'unica cosa cui ambisco è di capire il suo disegno man mano che egli lo svolge; non ambisco a levargli il lapis di mano e pretendere di diventare un autore della storia.

Don Lorenzo Milani

* * *

Miercus prin di Març: Miercus de cinise – Inizi dal Timp di Coresime.

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjant preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*

* *Par domandâ chescj libris scrivêt a info@glesiefurlane.org*